

Saturday, April 26, 2025

Time - 2:30pm

INTERNATIONAL HALF MARATHON

Sports Minister Pu Lalnghinglova Hmar-in Aizawl International Half Marathon chu taksa sawizawi leh infiamna lam chawilar nan bakah khualzin hipna a ni tih sawiin, kumtin buatsaih an tum tih a sawi . Sports Minister Pu Lalnghinglova Hmar chuan Akashvani zawhna chhangin tukina Aizawl International Half Marathon neih zawh tak chu an beisei phak bakin a hlawhtling tih sawiin, Mizoram pawn atangin mi engemawzat an tlan a ti a, International Half Marathon chu kum tin buatsaih an tum thu sawiin, nakkum lamah mi 5000 vel an tel beisei ani a ti a, Athletics Federation of India in Marathon buatsaih hun tur a ruahman thin tih sawiin AFI leh Mizoram Athletic Association te nen tang hovin theihtawp an chhuah dawn tih a sawi.

Sports Minister chuan taksa sawizawi an ngaihpawimawh thu sawiin, kum 2036-a India-in Olympics a thlen tur atan Mizoram chu theihtawpin a inbuatsaih a ti a, Mizo zingah Olympian pahnih chauh an la awm avangin Olympics-a tel tur Mizo infiammi a tam thei ang ber thun luh an duh tih sawiin fitness chu uar zel an duh a ti a, Mizoram a tha zawnga phochhuahna a nih bakah ruihhlo leh zuk leh hmuam dona a nih thu a sawi bawk.

Aizawl International Half Marathon hi Sports & Youth Services Department, Athletic Federation of India leh Innovations India Pvt. Ltd. te tangkawp buatsaih niin tukin dar 6:30 khan Aizawl Mualpuia Rajiv Gandhi Stadium atangin tlan tan a ni a, he intlansiaknaah hian hriat theih chinah mi 1075 an inziaklut a, hetihlai hian mi 400 chuang vel an tlan nia thudawn a ni. Intihsiakna hi hlawm thum a then niin, Half Marathon; Open Race bakah Fun Race te a awm a, Intlansiakna hi Rajiv Gandhi Stadium atanga bul tanin, Aizawl khawpui chhuahlam World Bank Road-ah tlanin, Rajiv Gandhi Stadium -ah bawk a tawp leh a, Aizawl International Half Marathon-a tel tam zawk te hi thalai kum 25 atanga kum 40 inkar te an ni a, hriat theih chinah tlan zinga upa ber chu kum 90 mi Pu VL Bela, Electric venga cheng a ni a, Tukina Marathon hi Larsap Gen (Rtd) Vijay Kumar Singh leh Chief Minister Pu Lalduhoma te chuan patron an nih angin an uap a ni.

**AMC**

Aizawl Municipal Corporation chuan thuchhuah siamin dan loa kawng kama thilzuar lui te chu tih chhunzawm tawhlo turin an ngen a, phalna hmuna thil zuar te chauh dawr turin mipuite an ngen tih an sawi.

AMC thuchhuah tarlan danin dan leh thupek bawhchhiaa Venghlui leh Tuikual South huamchhunga kawngkama thil zuar lui an awm chu pawl antih thu sawiin phalna hmuna zuar te chauh dawr turin mipuite an ngen thu an sawi a, Aizawl khawpui hmasawnna tur leh a chengte hma ngaiin dan kalha kawng kama thil zuar thinte chu hmun him zawkah a tahtawlin a sawn tih sawiin ti lui an zel chu pawl an tih thu an sawi.

Hetihlai hian Kawng kama thil zuara thu ten AMC-in kawngsira thil zawrh a khap sak chu an tan a hlawk loh avangin an thlawp lova, vawiin atangin kawngisrah an in zuar leh tan tih an sawi a, hemi chungchanga Akashvani zawhna chhangin, Tuikual South Local Council huamchhunga chawhmeh zuar thenkhatte chuan AMC thuawiha chawlhkar 3 chhung an thut chhungin an in hralh chhe thei hle niin an sawi a, thutna tur mumal siamsak an nih loh avangin a rem remah hnawh khawm an nih thu sawiin kawngsira thil zuarte chu khawsak harsa an nih avangin thuneituten ngaihtuah chiang se an duh tih an sawi bawk.



BORDER TALKS

Mizoram leh Assam ramri chungchang sawiho tura nimin state pahnih aiawh thukhawm ten ramri hrulah Status-quo vawn chhunzawm an remti. Mizoram Sorkar leh Assam Sorkar aiawhten ramri chungchanga inbiakna, Secretary Level Official Talk chu nimin khan Guwahat Rohika AAU- International Guest House-ah neih a ni a, hetah hian Mizoram aiawhte chuan Assam lamin ramri hrula hmalakna hrang hrang an neih thin chu ramri boruak ti tha lo thei anih avangin hmala chhunzawm tawh lo turin an ngen a, Inbiaknaah hian Mizoram-in ramri atana a pawm 1875 Notification kaihhnawiha Assam hnena kum 2023, February ni 13 leh November ni 28-a lehkha an thawnte chu uluk tak leh chipchiar taka sawi ho a ni a, 1875 Notification-in a huam chin ram chungchang te, khaw hrang hrang awm dan Mizoram-in Assam hnena a pek tawhte sawi ho niin Assam hian Mizoram Sorkar lehkha kum 2023, November ni 28-a thawn chhanna chu mumal takin a hma lamin thawn se, chumi hnuah Official Level Meeting-ah sawi ho leh ni se, an ti a. Official Level Meeting hi hun remchang hmasaah Mizoramah neih leh thuai ni se, Mizoram leh Assam ramri buaina chingfel turin boruak tha tak hnuaiah sawi hova hmalak zel ni se an ti a ni. Inbiaknaah hian Mizoram aiawhte chu Home Secretary, Pu Vanlalmawia hovin official 7 an ni a, Assam aiawhte chu Border Protection and Development Secretary, Prabhati Thaosen hovin mi 6 an ni a, Cachar, Hailakandi leh Sribhumi DC ten Video Conferencing hmangin an lo zawm ve bawh a ni.

Mizoram leh thenawm state Assam in kum 2021 July ni 26 a Vairengte dai-a Police-te'n silai hial an hmehpuah avangin ramri buai chinfel dan tur hi chak zawka dap a ni ta a. Hemi kum vek hian Assam border protection & development minister Pu Atul Bora hovin Assam palaite Aizawlah lokal in khatih laia home minister Pu Lalchamlia hovin Mizoram palaite nen an inbia a. A kum lehah Aizawlah bawh inbe leh in kum 2022 November thla khan Guwahati-ah minister pahnih kaihhruaite hi an inbe leh a. Vawi tam tak state pahnih palaite bakah Chief Minister ve ve pawh inbe pawhin ramri buai erawh chinfel ala ni rihlo a ni.



PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 121-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawh ang.

